

Powšitkowne WOZJEWJENJA

njedźelu, 2. decembra 2012

150 lět TCM a Katolski Posoł

Składnostnje 150. róčnicy založenja Towarstwa Cyrila a Metoda z.t. (TCM) budže štwórtk, 13. decembra, dżakne swjedženske zarjadowanje w Budyšinje. Wšitcy wěriwi, wosebje tež ći mnozy něhdyši a něčičiši roznošowarjo Katolskeho Posoła w serbskich wosadach, su wutrobnje na swjedžensku Božu mšu we 18.30 hodž. do tachantskeje cyrkwe swjateho Pětra přeprašeni.

Towarstwo swjateju Cyrila a Metoda bu 13. decembra 1862 w Budyšinje k spěchowanjn nabožnosće a narodnosće mjez katolskimi Serbami založene. Z tutym zaměrom wuchadźa wot januara 1863 časopis Katolski Posoł (KP).

Nimo tuteje dżakneje Božej mše su k jubilejomaj klětu dalše zarjadowanja planowane, kotrež su w interneće pod www.posol.de wozjewjene. *J. Špitank, předsyda TCM a farar G. Wornar, šefredaktor KP*

Adwentnička dekanatneje młodžiny

Tradicionelna adwentnička dekanatneje młodžiny je lětsa přenju adwentnu njedźelu, 2. decembra. Z nyšporom w Njebjelčanskej cyrkwi w 14 hodž. so wona zahaji. Po tym su młodostni do wosadnicy přeprašeni.

TCM – „Łužica pomha“ prosy wo šćedriwe dary

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ twar domu za cyrkwinski sobudźělaćerjow w Marksu a dźěło rjadnicow w Albanskej podpěrać. Wobej projektaj buštej njedźelu, 11. nowembra, w Katolskim Posole nadrobnje předstajenej. TCM prosy wěriwych wo šćedriwe dary na konto Cyrill-Methodius-Verein, kontowe čisło 828 23 66, BLZ 750 90 300 pola banki LIGA pod hesłom „Łužica pomha“.

J. Špitank, předsyda TCM

Zetkanje samostejacych

Samostejacy ze serbskich wosadow su na zetkanje wutoru, 11. decembra, w 14 hodž. do Domu biskopa Bena w Smochćicach přeprašeni. Zajimcy njech so hač do wutory, 4. decembra, w redakciji Katolskeho Posoła přizjewja, telefonowe čisło (0 35 91) 55 02 12. Štóż chce wotewzaty być, njech to prošu zdžěli.

Kubłanske dny studentow

Kubłanske dny studentow přewjedu so lětsa wot štwórtka, 27. decembra, do soboty, 29. decembra, w pólskim Opolu. Štóż ma zajim, njech so hač do třećeje adwentneje njedzele, 16. decembra, pola fararja Gabriša Nawki w Pančicach-Kukowje pod telefonowym čisłom (03 57 96) 9 62 65 přizjewi.

Adwentne dny za swójby

Serbske kubłanske srjedžišćo Lipa z.t. přeprašuje serbske swójby na adwentne dny wot pjatka do njedzele, 7. do 9. decembra, w Domje biskopa Bena w Smochćicach. Wjace zhonja zajimowane swójby pod telefonowym čisłom (03 57 96) 8 88 89.

Bože narodki

Hdyž swjećimy za měsac hody, budže zawěšće pola wšěch doma Boži narodk stać. Snano maće režbarjeny, snano tajki z metala, snano pak tež z cyle drugeho materiala. Sće waš žlobik snano zdžědzili? Abo prosće kupili? Abo běše to raz dar wašeje kmótry? Na stawizny wašeho Božeho narodka smy wćipni, tuž napisajće wašu swójbnu tradiciju z nim hač do póndžele, 10. decembra, na MDR 1 Radio Sakska/Serbski rozhlós, Póstowe naměsto 2; 02625 Budyšin abo na e-mail Serbski-program@mdr.de. Wot internetoweje strony www.posol.de je pokazka na wotpowědne strony Serbskeho rozhlósa podata.

W dohodownym tydženju chce Serbski rozhlós stawizny wo wašim Božim narodku powědać. Zdobom so wone w hodownym wudaću Katolskeho Posoła a w telewizijnym magacinje Wuhladku předstaja. Za wašu prócu kiwa wam nahladne myto.

Paslenje hodownych darikow

Dekanatne dušepastyrstwo přeprašuje šulerki a šulerjow 6. do 8. lětnika sobotu, 15. decembra, wot 9 do 13 hodž. na paslenje hodownych darikow do Don Boskoweho domu we Worklecach. Zajimcy njech so prošu hač do wutory, 11. decembra pod telefonowym čisłom (03 57 96) 8 87 07 přizjewja. Za wudawki dnja zběra so na wobdžělnika přinošk we wysokosći wosom eurow.

Sobustawski přinošk TCM zapłaćić

Předsydstwo Towarstwa Cyrila a Metoda namołwja wšitkich člonow, kotřiž njejsu lětsa hišće swój přinošk we wysokosći pjeć eurow zapłaćili, to hač do štwórtka, 13. decembra, nachwatać. Móžno je to na konto towarstwa pola LIGA Dresden, kontowe čisło 828 23 66, BLZ 750 903 00.

Adwentny koncert w Baćonju

Pod hesłom „Wotewrće wrota šěroko“ přeprašuje Serbski ludowy ansambl (SLA) njedželu, 9. decembra, w 14 hodž. na adwentny koncert do Baćońskeje cyrkweje. Ze serbskimi, němskimi, čěskimi a mjezynarodnymi adwentnymi spěwami chcedža chór a orchester SLA kaž tež džěćacy chór SMA pod nawodom Gabriele Donà připosłucharjow w dohodownym času přewodžeć. W koncerće zaklinča mjez druhim twórby Krawca, Nagela a Bacha. Wjeršk programa je premjera štyrihłósneje chóroweje sadžby Feliksa Brojera na spěw „Přihotuj so, luba duša“ Bjarnata Krawca. Tutón adwentny koncert předstaji so hižo sobotu, 8. decembra, w 16 hodž. na žurli SLA w Budyšinje a sobotu, 22. decembra, we 18 hodž. w Slepom.